

seaux, & de tant de sortes, qu'il se fait en ceste cy. Vers la part de Septentrion, sur le riuage de la mer, les premiers qui la descouurirēt, fouillans cōtre vn rocher, apperçurēt vn trou, de la haulteur de dix pieds, & autant en largeur. Apres auoir fait ou-^{Monuments de douze} uerture, quelques vns avec des flambeaux se vont hazarder d'entrer dedans, pen-^{pieds & de my de long} sans y trouuer quelques grands thresors: mais on n'y trouua chose quelconque sinon deux monuments de Pierre, dont chacun d'iceux n'estoit moins long que de douze pieds & demy, & large de quatre & demy ou enuiron. Ceux qui ont veu lesditz monuments, construits assez rustiquement, m'ont asseuré n'y auoir apparence ne d'escriture ne d'autre marque d'antiquité, sinon le pourtrait de deux grandes couleures, qui estoient autour desditz monuments, ensemble quelques lettres Hebraïques grandes de quatre doigts, & si antiques que à grand' peine les pouuoit on lire: toutesfois vn Maranne natif d'Espagne, fils de Iuif, homme versé aux langues, les peignit telles que ie vous les represente icy כהנסאל & estoient ces lettres au hault bout desditz monuments: & au bas ces deux autres mots כעלבי כהנא ל' interpretation desquelles ie sursoye, la laissant à ceux qui font profession de ceste langue. Et par cela chacun peut iuger, que ce peuple Hebreu a habité non seulement au pays de Iudee, ains par tout ce grand vniuers. Au surplus aduint vn iour, qu'un certain medecin voulant philosopher, & visiter les choses plus rares de l'Isle, accompagné de trois de ses disciples, entra dans ceste large Crotelque, dont tous quatre n'en sortirent iamais, & ne vous puis asseurer de quel genre de mort ils finirent en cest endroit leurs iours. Deux rustiques qui les auoient cōduits, & qui attendoient leur yssue, ne les peurent onc reuoir. Ainsi en aduint il à plusieurs esclauues, lesquels ayans forfait, & gagné la mort, ont esté enuoyez en ce lieu de supplice, & que on n'a veu onc depuis. Parquoy fut ceste ouuerture close & cimentee, & plus de trente ans apres, nul des Insulaires ne s'en sont osé aprocher, à cause de l'horrible tragedie que l'on auoit conceu de ces miserables, lesquels y allerent finir leurs iours. Incontinent que l'on a laissé lesdittes Isles des Effores à main droite, qui vouldroit courir le droit fil de l'eau, apres auoir laissé vn grand nombre d'Isles & Illetes, qui aboutissent en ceste coste là, comme celle marquée de l'Hesperie, faicte en la forme de l'Isle d'Angleterre, toutesfois qu'elle n'approche en rié de sa grandeur & richesse & celle marquée de Baccalos, laquelle à la voir vous diriez estre les quatre doigts d'un homme, estendus avec la main ouuerte: & l'Isle de Fiche, qui l'auoisine tirant de la part du Nord: & c'est en ces endroits où se fait la bonne pescherie: Quelques huit lieux de là, tirant tousiours de la part de Septentrion, vous apparoit vne grand terre, nommée de *Court-real*, descouuerte l'an mil cinq cens vii. par vn Capitaine, nommé Gaspard Court real, Portugais de nation: toutesfois que quatorze ans auparauant elle eust esté visitée par quelques Capitaines Rochelois, de la part du goulfe de Merofre, lesquels furent fort auant dans ledit goulfe. Et c'est en cest endroit, où le Pilote du Roy Henry d'Angleterre, avec bon nombre de Nauires, pensoit auoir trouué vn destroit, pour passer en la mer pacifique. Mais estant à la haulteur des cinquante neuf degrez, ayant vireuolté long temps ces contrees, non sans grand peine, à cause du froid, qui y est continuel, se trouua trompé de son entreprinse, & vint surgir en l'Isle de Caruelle, là où il cuyda perdre la vie, à cause des battures, rochers & dangers qui sont en cest endroit. Passant outre, entra dans la riuere, dictée De tourmente, quelques dix à douze lieux: où s'apperceuant de l'estrecissure de laditte riuere, & l'eau estre douce, fut contrainct de tourner bride: autrement eut esté en plus grand danger que iamais. Et furent en ceste sorte à sillonner ce goulfe deux moys entiers, & cōtraints de s'en